

湯顯祖集

〔明〕湯顯祖 著

徐朔方 箋校

全編

上海古籍出版社



湯顯祖集 全編

三

〔明〕湯顯祖 著

徐朔方 箋校



上海古籍出版社

湯顯祖集全編詩文卷一八

玉茗堂詩之十三

詩一百九十首

一五九八——一六一六，四十九歲——六十七歲。作於棄官

家居後，年月不詳。

秋日西池望二僊橋

池上映秋光，登臨愛夕陽。鏡中蒲柳色，衣上芰荷香。聽雨初留屐，當風一據床。猗蘭延客語，高菊以鄰芳。紫翠連山暝，晴陰隔水涼。坐看人世小，僊馭白雲鄉。

【箋】

〔二僊橋〕在臨川西門外。

【評】

沈際飛云：「從望字生神，極品。」

答威茂觀察東昌杜孝卿三十一韻

孝卿以行人給事南省，憲

秦，視學于晉，從滇入蜀。予篤友也。因王參知松潘寄答焉。

杜曲佳期傍，琴臺遠意憑。地卑高士喜，才絕衆人憎。身世隨寒耐，行藏畏熱懲。九州趨黽敏，一榻坐驕矜。祠廟高天問，郎官列宿應。薄遊貧自許，多病俗猶仍。歲月珠彈鵠，乾坤玉點蠅。閒情深洞壑，朝夢減觚稜。興盡炎荒得，心傷小縣曾。春風依雉廩，秋水卧魚罾。出豈營三徑，歸將買一塍。雨寬春穗沒，星急夏糧升。忽忽雲霄落，皇皇枕簟興。尺箋飛錦水，清色見壺冰。耳熱歡何極，心灰泣未能。行人周禮貴，給事漢官澄。綬合蕭朱結，金分管鮑稱。每過談似綺，時憶酒如澗。雨閣催金盞，風窗遶翠燈。笑連江月爽，別恨海雲蒸。豸使秦師拱，龍門絳士

登。十年驚會面，一語氣填膺。南國精神闊，西方美思凝。動人鷗鳥片，歸客暮帆層。問政懸巴子，題書到蜀僧。牙旗掀岫玉，井絡度橋繩。江東喧金馬，嵐開濕皂鷹。使須高節鉞，羌莫小憑陵。入洛思眠錦，如邛欲杖藤。峽雲看不免，嶺雪興如乘。獨羨松參少，西南正得朋。

【箋】

〔威茂觀察東昌杜孝卿〕名華先。見卷九送杜給事出憲延安箋。

〔王參知松潘〕名志。東鄉人。時任四川參知備兵松潘衛。見撫洲府志卷五一。

懷王參知松潘

仗節西遊自一時，雪山秋色照峨眉。義之只作常言語，未了汶江一段奇。

【箋】

參看前詩。

【評】

沈際飛評第三句云：「注脚妙。」

問松潘使者

松潘長夏雪花吹，萬疊碉房日上遲。大有牛羊張笮酒，不妨蝦菜似龍芝。

【箋】

參看前詩。

送學官成都

扁舟黃葉向秋分，江楚天西滿白雲。到得玉堂無一事，文翁真作梓潼君。

輓司徒新城王公十四韻

蜀制府公尊人也。

灤海齊風大，琅邪晉祚榮。王公天下寶，公子國之禎。策奏燕臺重，書開楚服清。掖闈持大體，卿署起鴻名。太僕鳴騶入，中丞仗鉞行。尹京懷舊德，農扈振新

聲。國論推儒雅，軍儲屬老成。文謨通帝座，武緯緝天營。袞服歸何急，金甌覆已明。麒麟看畫像，烏鳥聽陳情。七秩蒲輪待，三公赤芾迎。仙遊旋岱嶽，遺事足滄瀛。世嘆青箱遠，天悲玉柱傾。東歸吾有輓，綸綍正西平。

【箋】

〔蜀制府公〕王象乾。山東新城人。時以兵部左侍郎總督川湖貴州。其父之垣，官終戶部尚書，故云司徒。詩所云「太僕鳴騶人」等句都是其祖重光勳績。一門數人，山東通志卷二八各有傳。

與劉浙君東

鄰近無千里，交親有十年。花林恒共蹠，草榻並曾眠。世路銜盃裏，韶春把鏡前。關河連紫氣，雲霧滿青天。座有寧馨語，牀空阿堵錢。丹陽汝孤往，白下我悠然。南士爭攀柳，西娃正採蓮。遊人如漢渚，公子似秦川。媚影皆馳賞，攢心別可憐。松毛閒玉塵，竹筍代金蟬。地氣經南薄，天心正北懸。鶯花三月晚，貧病一生全。上藥終難就，勞薪半已燃。塵情多擺落，芳意久連緜。八水將圖佛，三山欲候

僊。題書寫微尚，會獎即冥筮。

【箋】

〔劉浙〕字君東。江西泰和人。理學家。據泰和縣志卷一八本傳，楊繼盛被害時十二歲，卒年七十一。其生卒當爲一五四四—一六一四。

【校】

〔松毛閒玉塵〕塵，萬曆本誤作塵。

【評】

沈際飛評「韶春把鏡前」句云：「活。」

用韻和方玉成二十韻

天柱山迴煙月餘，長年發興自匡廬。爐香合沓青華蓋，瀑練分明玉佩裾。拂匣斗牛趨劍浦，射蛟風雨出龍舒。溢城雪照秋雲白，鍾寺紅殷海日虛。托道茫茫初向

若，經知渺渺欲愁予。歸休事業留華闕，籍甚文章付石渠。千里明妃琴際語，十年幽客鏡中噓。松篁韻合傳堪賞，蘭菊蕪滋長欲除。倏歛臨川悲逝者，參差吾黨到歸與。猶龍氣色周藏史，衰鳳吟聲楚接輿。但着佳時長度曲，將因妙處一傳書。端居歲月鷗羣隱，高閣園林蝶夢遽。忽忽雲霞生研席，蕭蕭燈火候柴墟。粗拚卷帙論心後，盡倒衣裳識面初。露重草根深蟋蟀，風輕木末半芙蓉。新通曲徑延三益，舊滿高堂學二疎。興劇漉巾差有酒，驩非彈鋏敢無魚。諸兄蚤借烏臺筆，一第遲飛玉殿臚。江外遊閒公子路，山中清遠道人居。能來更作趺然喜，況復他時使者車。

【箋】

〔方玉成〕名大任。桐城人。若士去世之年，即萬曆四十四年（一六一六）始登進士第。見安徽通志卷一七九。

【評】

沈際飛評「溢城雪照秋雲白」句云：「有推敲。」評「露重草根深蟋蟀」句云：「園林合有之語。」又評結句云：「一句頌。」

吳序憐予乏絕，勸爲黃山白嶽之遊，不果

欲識金銀氣，多從黃白遊。一生癡絕處，無夢到徽州。

【評】

沈際飛評云：「序亦是妙人。聞說金休寧，謁選者百計營之，而抽豐者往往於此取道。臨川詩一帖清涼劑也。」

香城寺口占，時洪都諸老有道術者與豐城李稠原侍
御爭此，諷之

卜兆已下策，訟言無遠情。寸心埋不朽，何必在香城。

【校】

〔題〕沈本作「聞友人以卜兆香城訟者」。

稠原家豐城，說有佳地在華山下，肯見推與，笑答

道眼久相假，仙原能見聞。得傍牛斗氣，雙棲華蓋雲。

【箋】

〔稠原〕疑即李瑄。豐城人。萬曆五年（一五七七）進士，任南京御史。萬曆十九年以奉表進京，上章彈劾首輔申時行，削籍家居。明史有傳略。

〔華山〕一名華蓋山。在江西崇仁。

贈龍君揚公子凌玉泰和三首

江上見龍駒，金鱗照紫虛。龍門開日日，何得尚爲魚？

快閣一中酒，淋漓醉墨花。池亭開示客，秋影見龍蛇。

龍門低夕照，一柱遠擎天。見說盃中好，還須惜少年。

【箋】

〔龍君揚〕顯祖好友。見所作前朝列大夫飭兵督學湖廣少參兼僉憲澄源龍公墓志銘。

【評】

沈際飛評第一首後半云：「化腐。」又評第二首云：「不脫龍字。」

偶嘆

偶向交衢立，長風吹我襟。不知來往客，終日是何心。

【校】

〔題〕沈本作「閱世」。

四阿羅漢口號

月下了殘經

明暗自一時，未斷言語路。窅爾月中人，下來參文句。

雪剌

一法不可作，煩惱不得絕。正好日通紅，落盡刀山雪。

降龍

鉢小龍亦小，龍大鉢即大。若作小因緣，終成陰器界。

伏虎

有勢莫使勢，有智莫使智。遭際此癡蟲，瞢瞪作佛事。

【評】

沈云：「禪偈。」

坐故椅懷揚州蕭成芝

念年斑竹椅，寒色映瓜州。坐客蕭然遠，懷來清淚流。

送客九江有謁

候鴈三春盡，晴雲九疊開。
祇應溢日月，曾見白公來。

【評】

沈際飛云：「淡遠。」

題租曆後四首

欲歛東臬稅，須清南畝菑。
獨笑陶彭澤，持籌寫簿時。
佃客題名滿，倉塵漬墨深。
了無江海意，真有稻梁心。
擇日裝新曆，逢年慶濁醪。
老蒼教落墨，莊客對揮毫。
報國將爲報，傳家足此傳。
今朝外史氏，宜書大有年。

銀俵詩 有序

予友朱元芳持其宗人家閩邵汀山峪中得窖金銀器歸，忽忽穢甚，不可禁，且小口時有癩厥。長老云是流賊窖金時，常困苦一人，至求死不得，約之曰：「爲我守窖否？」其人應許，復苦之。如是數四應許畢，之窖中。遇金者祭度而後可。朱氏如教上章，曰：「汝爲賊守久，當我得此金，度汝命。」已而穢淨病已，朱氏用富。有中表周氏遇此，度之終不能得也。反其金窖中。嗟夫，人之於人也，豈不甚哉。昔聞虎俵，茲爲作銀俵詩。

死仇爲仇守，俵爾何其愚。試語穴金人，此術定何如。

【校】

序文首二十二字，沈本作「友人云，世有虎俵，有銀俵。吾宗人家閩邵峪中，有得窖金歸」。又「忽忽穢甚」，沈本少一「忽」字；「長老云」以下十字，沈本無「流」、「困」二字；又末句，沈本無「昔聞虎俵，茲爲」六字。

帥從升兄弟園上作四首

宿草春歸幾醉醒，白頭吟望暮山青。
思君小閣東園好，棠棣花前看脊鴿。
池上青山醉倚門，迴車陌巷小游園。
留連未覺鶯花老，桃李深深更一言。
小園須着小宜伶，唱到玲瓏入犯聽。
曲度盡傳春夢景，不教人恨太惺惺。
斷霞秋色剪澄江，白鳥晴邀彩筆雙。
客去會須酬一醉，枕欹山雪夜鳴窗。

【箋】

〔帥從升兄弟〕同里友人帥機之子。

【評】

沈際飛評第三首云：「爲四劇意得。」

中暑索帥二從燒醞

百尺高樓傲不消，侵風障日卧峇嶢。不應便得清寒病，爲愛連珠麴女燒。

【箋】

參看前詩。

帥從升赴省試問開遠兒何日往

江外閒題一葉書，紅裙愛子戀何如。章門最近龍門路，未敢爭先八月初。

【箋】

參看前詩。

行千金隄懷蜀人古太守

曾用三犀壓水精，蜀人文雅世清平。年來太守風流盡，分付漁歌與棹聲。